

جحا يبحث عن هدية لماما

هبطت طائرة جحا الخاصة في ميدان السيدة نفيسة، وذلك بعد انتهاء رحلته التنقيبية عن الجين الوراثي (العصص) لآدم عليه السلام أو أحد الأنبياء والقديسين، وذلك ليصنع منه دواءً للانحطاط الأخلاقي، وتطهير الأنفس من الدنس الذي استشرى بين الناس، وذلك بعد يأسه من تفعيل خطابات هرمس ووصايا الجبل، وأحاديث العشاء الأخير وخطبة الوداع للمصطفى، ذلك فضلاً عن أحاديث زرادشت وبوذا وكونفوشيوس الأخلاقية.

فقد أدرك جحا أن خطابات الوعظ والارشاد لم تُعد كافية لإصلاح ما فسد، فالتطهير أصبح من الضرورات والحاجات الملحة للواقع المعيش. خرج جحا من باب الطائرة بصحبة طبلته وطرطوره وحنطوره، وراح يتفقد الناس من حوله، ثم أمسك بمحمولة ليطمئن على حفيديه يس ورقية حيث يعقد عليهما الآمال وصلاح الحال.

وقد اختلق حشود المستقبلين أحد الرجال ويُدعى يعقوب الصيرفي..

يعقوب: وحشتنا يا جحا ومليون سلامات فين كاشاتك يا عمدة ورزم الدولارات؟

جحا: جرا ايه يا خبيث ما الدولارات سحبتوها وانفتتوا على خراب بيت أمي والعيال تجوعوها، حتى الشيخ بندر واصحابه البهوات هربوا

فلوسهم لبره بالفاكسات والتحويلات، ما هُما برضوا عاوزين يوقعوها مادام معروفش ينهبوها.

وانبرى الأسطى صلاح مهنتاً بسلامة الوصول قائلًا:

صلاح: حديثك عن الكلامنجية عجيني بس مبطلوش، والبرلمانات والصحف الغربية ما بيهمدوش وكلام الناس عن الأطباء والشرطة وسواقين التكتاك، وتوتو العجيب، وقاضي القضاة، والقضايا المركونة، والعدالة المسجونة، وغياب الزيت، والغلة المطحونة، وكلام تاني ما أنزل الله به من سلطان، لا بيا كل جعان ولا يبسقي عطشان.

والكل يقول بدون حرج بعد ثورتين والحال زي ما هو وما جاش الفرج..

جحا: أنا متابع يا أبو صلاح واللي جاي أكيد أحسن من اللي راح، والدفعة المكسورة بيعدها الملاح، بس القضية أنه لوحده مفيش بحارة تساعد بمجاديف، والفالح منهم مستني التكليف والخلاصة انه محدش عاوز يشتغل، وفاكرين اللقمة هيحيبها الجن من ورا الجبل، والمصريين نسيوا إن الأيد البطالة نجسة، والرزق ربنا بيعته لما نخلص في العمل.

وبعدين متنسنيش إني عاوز أجيب هدية لماما، عشان البر والوفاء يقالوا أمانة وعلامة.

على جنب الطريق كانت تجلس امرأة تدعى أم يسار كلامها زي الدبش وعنيها بطق شرار..

أم يسار: عاوز هدية لأمك بلا وكسه، داهية تغمك، اشتريلها الشرف

أصلها بقت مفضوحة لا شرعية ولا دين وابنها اللي جبتوه بيلعب حلمبوحه
ولا عارف يوكل عيالها ولا يداوي المجروحة.

جحا: بتقول أشرتيلها الشرف وانتي الخُبث كله فيكي والرجس والدنس،
وبتقول إفيه ريحته قرف، يا وليه انتوا اللي خربتوها وكل ما تقيم راسها
بإديكم القدرة بتضربوها، وبتستعدوا عليها الأبالسة علشان تضيعوها.
وعلى الجانب الآخر من الطريق وقفت الأنسة زهرة تُرحب بجحا..

زهرة: أقولك على هدية لماما، أقطف من عدن عشر وردات، الحب والعفة
والحياء والصبر والتقوى والرحمة والأمل وعود فُل وزهرة الحنّ، وياسمينه
من الجنة، واربطهم في صحبه، وجمع عيالها اللي بيغنولها واللي بينوها واللي
يحموها عصة.

جحا: كلامك جميل والهدية مناسبة ومعقولة والورد أبغ دليل للود بس
مش هيشفيها، ولا يوكل عيالها ولا يمسح دموعها على الشهداء، ولا يسدد
ديونها، ومتنسيش إنها عننا مسئولة.

ثم وقف جحا أمام محل جرجس للالكترونيات، ودخل وقابله أبناء
صديقه كرولس، وأخيه في الرضاعة وسأله..

جحا: إيه يا شباب هما مخترعوش لسه شريحة تنقذنا من العذاب وتشفينا
من التنبلة والكذب والقسوة وتحول الطعمية والبول لطرب وكباب؟؟؟
شريحة تخش العقل وترجعه نضيف زي ما كان مافيهوش خُبث ولا حسد
ولا خيانة وتقوي فيه الورع والشهامة والأمانة؟

أحد أبناء المعلم كرولس: شريحة إيه يا عم جحا؟ عاوزها للنت ولا

اتصالات.. باين عليك بتحلم لا أجدادنا اخترعوها ولا الخواجات صنعوها..
اللي ينضف السراير وينقي الضماير ارادة من جوه وصّى بها موسى وعيسى
ومحمد.. الشريحة اللي انتة عاوزها اسمها التقوى.

واحسن هدية نهدىها لماما في عيدها صحيفة نكتبها بدمنا.. ونمضي عليها
كلنا.. ونقسم فيها على إخلاصنا ليها.. والعمل بإتقان علشان نحميها.

جحا: أنا مقتنع بس العهود بالفعل مش بالكلام ومش بالأغاني ولا
بالأفلام، تعالى انا وانتة نلف على البيوت في كل حارة وشارع، مش علشان
نلم معونة، ولا حق الهدية المكنونة، لأ علشان نحقق كل إيد تعرف تعلم
وتبني وبصوت الحق تكتب وتفهم، وبكده بس نعرف نجيب الهدية ونبوس
إيدين ماما وراسها ونسلم.